

Plussrekneskap, men knappe marginar

– Gjennom godt arbeid, god budsjett disiplin og god budsjettstyring i heile organisasjonen, fekk Hordaland fylkeskommune i 2018 på ny ein rekneskap i pluss. Eg vil retta ei stor takk til medarbeidarar på alle nivå for vel utførte jobb, seier kst. fylkesrådmann Ingrid Holm Svendsen.

Hordaland fylkeskommune kjem ut med 20,8 mill. kr i overskot på 2018-rekneskapen. Driftsutgiftene i sektorane viser godt samsvar med tildelte budsjett. Lånegjelda auka moderat og gjeldsgraden gjekk ned i 2018.

Nøkternt og målretta

– 2018 var eit nytt år der det er arbeidd nøkternt og målretta i heile organisasjonen. På ny er det grunn til å gje honnør for god økonomistyring, seier kst. fylkesrådmann Holm Svendsen.

Stram økonomistyring er hovudårsaka til det positive resultatet. Skatteinngangen i 2018 vart 22,5 mill. kr høgare enn budsjettet. Utgiftene til renter på lån vart 26,5 mill. kr lågare enn budsjettet.

Hordaland var og i 2018 mellom fylka som fekk mindre skatteinntekter enn landsgjennomsnittet. På landsbasis var skatteauken høgare enn føresett i statsbudsjettet. På grunn av utjamningsregelen i inntektssystemet vart dermed skatteinngangen i Hordaland betre enn budsjettet.

Over 12 milliardar

Fylkeskommunen sine totale driftsutgifter var i 2018 på 8 495 mill. kr. Til renter og avdrag på lån vart det brukt 813,5 mill. kr, som er 97 mill. kr meir enn i 2017. Auken kjem av større nedbetaling av lån. Investeringane i 2018 var på 2 838 mill. kr.

– Samla omsetnad for fjoråret kom opp i ca. 12 milliardar kroner. Det viser tydeleg at fylkeskommunen er ein stor og viktig samfunnsaktør, seier kst. fylkesrådmann Holm Svendsen.

Sektorane

Det største tenesteområdet er samferdsel med driftskostnader på 3 474 mill. kr i 2018. Opplæringssektoren følgjer deretter med kostnader på 3 222 mill. kr. Desse to sektorane står for 79 prosent av driftsutgiftene.

For dei andre sektorane viser rekneskapen desse brutto driftsutgiftene: kultur og idrett 535 mill. kr, tannhelse 354 mill. kr, regional 340 mill. kr, økonomi og organisasjon 208 mill. kr, eigedom 367 mill. kr, politisk verksemd og kontrollorgan 74 mill. kr.

Gjeldsgraden ned

Fylkeskommunen har i mange år investert tungt i nye og framtidsretta skulebygg, tannklinikkar, fylkesveggar og bybane. Det har resultert i ei lånegjeld på 10,72 mrd. kr ved utgangen av 2018 med ein gjeldsgrad – gjeld i prosent av driftsinntekter – på 109,4 prosent. Dermed har gjeldsgraden gått noko ned frå 2017.

Krevjande situasjon

Trass i det positive rekneskapsresultatet, har fylkeskommunen ein krevjande økonomisk situasjon. Netto driftsresultat var på knapt ein prosent, ei halvering frå 2017 og klart under den tilrådde norma på 4 prosent. Høg lånegjeld og auka kostnader med nye, miljøvenlege ferjer og miljøvenlege bussar frå 2019-2020, vil føre til sterk auke i både drifts- og investeringskostnadene dei komande åra.

Treng vekst

– Den nye Vestland fylkeskommune treng ein vesentleg inntektsvekst i åra framover for å makte kostnadene med klimaløftet. Slik vi har gjort i mange år no, krevst det framleis grundig prioritering av aktivitet og tenestetilbod i komande år, seier kst. fylkesrådmann Ingrid Holm Svendsen.

– For 2020 og den nye Vestland fylkeskommune vil det verte svært avgjerande kva rammevilkår regjeringa vil gje den nye regionen. Eg har enno tru på at vi i alle fall vil få draghjelp eit stykke på veg,

seier kst. fylkesrådmann.

Honnør frå fylkesordføraren

– Eg vil gje honnør til alle einingane og medarbeidarane for innsatsen og det gode resultatet. I 2018 er det på ny arbeid målretta for å levere gode og solide tenester til innbyggjarane i Hordaland innan alle tenestoområda våre, seier fylkesordførar Anne Gine Hestetun.